



Број/Број: 03-/4-50-1-10-7-13/07
Сарајево/Сарајево: 20. 12. 2007.године

ZAPISNIK

7. sjednice Zajedničke komisije za evropske integracije Parlamentarne skupštine BiH, održane 19. 12. 2007. godine

Sjednica je počela u 9 sati.

Sedmu sjednicu Zajedničke komisije za evropske integracije Parlamentarne skupštine BiH sazvaо je predsjedavajući Halid Genjac.

Sjednici su prisustvovali članovi Zajedničke komisije: Halid Genjac, Drago Ljubičić, Ivo Miro Jović, Alma Čolo, Šemsudin Mehmedović, Milica Marković, Branko Dokić, Vladana Lučić, privremeni sekretar Komisije, i Sabina Pstrocki, pripravnik-volonter. Azra Hadžiahmetović, Rudo Vidović, Hilmo Neimarlija i Zoran Koprivica opravdano su odsustvovali.

Sjednici su prisustvovali i: Osman Topčagić, direktor Direkcije za evropske integracije; članovi Misije OSCE-a u BiH – Program podrške parlamentu: Doina Ghimici, Elma Kadić, Metju Oukli i Uraela Erceg.

Sjednicom je predsjedavaо predsjedavajući Zajedničke komisije Halid Genjac.

DNEVNI RED

1. Usvajanje zapisnika 5. i 6. sjednice Komisije;
2. Razmatranje Izvještaja o napretku Bosne i Hercegovine u 2007. godini;
Uvodno izlaganje: Osman Topčagić, direktor Direkcije za evropske integracije;
3. Tekuća pitanja.

Ad. 1. Razmatranje Izvještaja o napretku Bosne i Hercegovine u 2007. godini; Uvodno izlaganje - Osman Topčagić, direktor Direkcije za evropske integracije

Direktor Direkcije za evropske integracije Osman Topčagić prezentirao je članovima Komisije najvažnije dijelove iz Izvještaja o napretku Bosne i Hercegovine u 2007. godini. On je rekao da je Izvještaj dobro izbalansiran i da u njemu nema iznenađenja, posebno naglašavajući ulogu Evropske komisije, koju je nazvao najvećim saveznikom Bosne i Hercegovine u procesu pridruživanja. Pored Godišnjeg izvještaja o napretku, Evropska komisija pripremila je još dva dokumenta: Strategiju proširenja i Evropsko partnerstvo, u kojem je sadržana i lista prioriteta za 2008. godinu. Prioriteti se podudaraju s obavezama Bosne i Hercegovine sadržanim u Sporazumu o stabilizaciji i pridruživanju, a podijeljeni su na kratkoročne, za koje se očekuje da budu ispunjeni u roku od jedne do dvije godine, i srednjoročne, za koje se očekuje da budu ispunjeni u roku od tri do četiri godine. Kao osnovne prioritete direktor Direkcije naveo je: provođenje reforme policije u skladu s tri principa EU, saradnju s Međunarodnim krivičnim sudom za bivšu Jugoslaviju, uređenje odnosa sa susjednim državama, u smislu rješenja za neriješena bilateralna pitanja, provođenje Strategije reforme javne uprave, jačanje jedinstvenog ekonomskog prostora, te provođenje reforme javnog emitiranja.

Topčagić je naglasio da na Evropsko partnerstvo Bosna i Hercegovina treba da odgovori Akcionim planom za provođenje prioriteta i podsjetio da Direkcija za evropske integracije već radi na Programu pridruživanja BiH Evropskoj uniji i da će taj dokument biti finaliziran krajem proljeća.

Govoreći o nedavnom parafiranju Sporazuma o stabilizaciji i pridruživanju, Topčagić je posebno naglasio da je sljedeći korak potpisivanje Sporazuma, koje se očekuje već krajem februara 2008. godine. Primjena Sporazuma počinje prvog dana drugog mjeseca od dana kada se Sporazum potpiše. On je također rekao da je evidentno da u zemljama članicama Evropske unije postoji otpor prema daljnjem proširenju, ali je važno da Bosna i Hercegovina pokaže da se Sporazum o stabilizaciji i pridruživanju dobro provodi od samog početka, kao i da radi na svom pozitivnom imidžu, te da je sljedeći korak podnošenje zahtjeva za punopravno članstvo u EU. Topčagić je još napomenuo da se, i pored režima viznih olakšica koji stupa na snagu 1. 1. 2008., pojedine zemlje EU protive oslobađanju od viznog režima građana BiH, a naročito Njemačka, Francuska i Austrija, uglavnom zbog povezivanja imigranata iz BiH s terorizmom. Ukazao je na štetnost plasiranja takvih tvrdnji za sve etnicitete u BiH i ponovio da se Sporazum o stabilizaciji i pridržavanju odnosi na sve državljane BiH.

Topčagić je na kraju izlaganja govorio o radu Direkcije za evropske integracije, kao i o kadrovskim potencijalima i prostornim kapacitetima koje je potrebno unaprijediti, da bi Direkcija mogla adekvatno odgovoriti novim izazovima pred kojim će se naći nakon potpisivanja Sporazuma o stabilizaciji i pridruživanju. U tom smislu on je od Komisije za evropske integracije zatražio da, u okviru svojih nadležnosti, doprinese da se uslovi rada DEI poboljšaju.

Ivo Miro Jović predložio je da, nakon konstituiranja novog Vijeća ministara BiH, Komisija inicira radni sastanak na kojem bi se razgovaralo o nadležnostima i obavezama institucija BiH, nakon potpisivanja Sporazuma o stabilizaciji i pridruživanju.

On je, osvrćući se na rad RTV servisa, još jednom ukazao na potrebu emitiranja programa na hrvatskom jeziku. Jović je rekao da činjenica da hrvatski narod nema pravo na sredstvo informiranja na svom jeziku spada u domen kršenja osnovnih ljudskih prava. U tom kontekstu on je naglasio da nije dobronamjerno ako međunarodna zajednica nekim svojim postupcima želi kontrolirati krizu, a ne riješiti je.

Selim Bešliagić također je zatražio da se održi sastanak s Vijećem ministara BiH, te predložio da DEI provede anketu kojom bi se utvrdila stvarna slika administrativno-tehničkih kapaciteta BiH, a naročito certificiranih institucija koje mogu vršiti atestiranje u skladu s evropskim standardima.

Drago Ljubičić pohvalio je rad DEI i direktora Topčagića, te istakao važnost održavanja sastanka Komisije s Vijećem ministara BiH.

On je, govoreći o viznom režimu, rekao da je važno da sigurnosne i obavještajne službe BiH sačine detaljne informacije o problemu terorizma, ako se BiH s njim suočava.

Branko Dokić rekao je da Komisija ne treba da traži sastanak s Vijećem ministara BiH, ako u toj komunikaciji nema šta ponuditi. On je rekao da je važno da Komisija sinhronizira svoje aktivnosti s aktivnostima DEI, kroz Akcioni plan za narednu godinu.

Dokić je posebno istakao doprinos Zajedničke komisije za evropske integracije u rješavanju problema reforme policije.

Predsjedavajući Komisije Halid Genjac rekao je da je Komisija u poziciji da od Vijeća ministara BiH traži Akcioni plan za pridruživanje EU i ima pravo da inicira pitanja koja se odnose na proces evropskog integriranja. On je najavio da će Program rada Komisije za 2008. godinu biti pripremljen do kraja januara, te da će se bazirati na kratkoročnim i srednjoročnim prioritetima iz Izvještaja o napretku. Predsjedavajući je naglasio važnost usklađivanja Akcionog plana Vijeća ministara BiH s Planom rada Komisije za 2008. godinu.

Nakon rasprave, a na prijedlog predsjedavajućeg, jednoglasno su usvojeni sljedeći **zaključci** :

- 1. Izvještaj Evropske komisije o napretku BiH u 2007. godini objektivno i balansirano odražava situaciju u BiH i treba da posluži kao osnova za izradu Programa rada u 2008. godini svih institucija u BiH koje učestvuju u procesu evropskog integriranja BiH.**
- 2. Do kraja januara Komisija za evropske integracije usvojiti će Program rada za 2008. godinu zasnovan na Izvještaju o napretku BiH.**
- 3. U naredna dva mjeseca, na jednoj od sjednica Komisije, posebna tačka dnevnog reda bit će razmatranje rada DEI, u smislu ispunjavanja kadrovskih i prostornih pretpostavki.**
- 4. Komisija će zatražiti od Vijeća ministara BiH da, u roku naredna dva mjeseca, Komisiji za evropske integracije, kao nadležnoj komisiji, dostavi Akcioni plan Vijeća ministara BiH za ispunjavanje prioriteta iz Evropskog partnerstva za BiH za 2008. godinu.**

Ad. 2. Usvajanje zapisnika 5. i 6. sjednice Komisije

Zapisnici 5. i 6. sjednice usvojeni su jednoglasno.

Ad. 3. Tekuća pitanja

Predsjedavajući Komisije Halid Genjac upoznao je članove Komisije s nacrtom dnevnog reda seminara u organizaciji OSCE-ovog Programa podrške parlamentu, čija je realizacija planirana za 14. i 15. februar 2008. godine.

Uz navedene teme, kao što su: politika EU i BiH, proces donošenja odluka u EU, Lisabonska strategija, te proces stabilizacije i pridruživanja BiH, predsjedavajući je predložio da se u nacrt dnevnog reda uvrsti i prezentacija o finansijskoj pomoći zemljama iz pretpristupnih fondova (IPA). Doina Ghimici iz OSCE-a, organizator seminara, prihvatila je sugestije predsjedavajućeg i naglasila da će nastojati modificirati dnevni red seminara.

Predsjedavajući je pozvao sve članove Komisije da svojim učešćem doprinesu uspješnoj realizaciji seminara.

Sjednica Komisije završena je u 11 sati.

Predsjedavajući
Zajedničke komisije
Halid Genjac